

小方壺齋

小方壺齋

外國史畧

英國馬禮遜著

亞悉亞東南洋海岸各國北連中國之雲南廣西廣東南及暹羅海隅及南洋羣島東及安南東都海隅西連榜甲拉海隅在亞西亞各國之至南其長江曰拖拉瓦的江一名大金沙江由雲南流出逕緬甸四千四百里入榜甲拉海隅水深廣可入大海船若小三板船可及雲南界撒路音河一名渴江亦由雲南下流直南入緬甸之馬他班海隅其北支內多暗沙南支則水深三十里默南江一名沅江亦由雲南下流南向入暹羅灌田最豐盛其江最深而出口處反淺默南君河即瀾滄江由雲南流入越南西都有漳江溪港有兩條西方係緬甸國並英吉利藩屬地其東越南中間爲暹羅老掌等地南則爲燕萊由族類越南國北極出地自八度三十分及二十三度偏東自一百零五度及一百零九度廣袤方圓六千七百七十里民在東都者千餘萬在廣南百有餘萬在占臘或在干賓百五十萬越南南連暹羅東及大臺北與中國交界西連老掌其全國之地自古占臘地起如區粟鎮河僊南榮安江永清定祥蕃安邊和平順衙莊富安歸仁和義廣南皆南地也其中央有廣德廣治廣平又安東京各鎮北方有清內清外興化南上南下海東京北山西高平郎北太原宣光廣安等鎮其南方占臘之地地低田肥無山林人繁盛民不習勤國君又不知教養故府庫充而百姓貧乏惟與中國交界之東都居民蕃庶勤勞能製各物又花河邊之順化田肥地茂其內山多磽确地出米煙檳榔白糖玉桂皮胡椒檀香奇南香粗茶葉等貨港口便通商面貌皆似中國本漢人之苗裔也其文學亦用中國字讀中國書法度規矩風俗皆與中國彷彿士民伶俐恆帶喜色多巧思衣尚黑不好潔不浴身畏應徭役女乏貞節代男苦勞以養其家庶民貧乏惟僑寓之漢人免徭役農力勞而收薄商賈多漢人所運出者檳榔白糖胡椒最多通商極興旺船由埔寨來者載米鹽等貨赴新埠頭貿易國王亦調兵船每年赴港并赴旁甲拉東都所運賣者係粗磁等貨所造之

萬鎗大礮等火器尤妙東都出胡絲但不如中國之細衣布緞紗皆粗其上者必買自外國乾隆三十八年西都有兄弟三人一爲將軍一爲商賈一爲和尚其驅國王世子有佛蘭西教主舊世子求援於暹羅國并往佛國求救是時三奸已據其國虐其東征者不服水土斃死甚眾王駐伶仃島於是佛國與本地義勇力驅奸徒又攻擊東都舊王復位乃用佛官練兵鑄礮又建戰船如西洋之甲板且築礮臺自後武事日興乘占臘國王內亂與暹羅分據其地直入祿賴每年調兵船載餽貨赴新埠等港貿易所寓漢人亦駛各港口在占臘載貨物王自操全權不與鄉紳會議所納各稅約五百萬兩其西都曰順化府居民三萬各江邊離海二里北極出十六度四十五分偏東一百零六度三十二分城周二里高三丈兵房周繞殿宇民居半以竹葵爲之大礮火器甚多皆佛蘭西造作初王亦許以海邊土地給佛國居住後不踐約其佛官漸歸本地於是通商悉罷且絕佛國嚴禁天主教然東都占臘廣南各地尙有思奉教者東都京北鎮之港口居民十五萬與中國貿易最興旺之港口祿賴居民十三萬多暹羅小船及中國大船又歸仁衙莊富安三處亦通商興旺之地占臘古都今雖廢居民猶三萬有餘此安南通國情形之大略也暹羅國廣袤萬三千三百三十方里民居五百萬北極出地自五度至十九度南及同名之海隅北連老掌東及越南西連英藩屬地至緬甸北有山南方有低谷黑南河之所南流也地豐裕海島星羅棋布由中國進暹港過七洲見外羅山向南則玳瑁洲鴨洲崑倫偏西則大真嶼小真嶼西北爲筆架山向北至暹羅港竹嶼草木茂盛多磽地無居民古分羅國暹國後合爲一國崇佛教惑風水王衣彩肉貼飛金用金皿陸乘象亭象輦駕龍鳳舟設官屬曰招夸以裸體跣足俯腰踞踞爲禮見尊貴不衣褲用小幔圍之尊敬中國用漢人爲官屬理國事掌財賦城郭軒朗沿溪皆樓閣多鱷魚從海口至國城水深闊洋舶隨之夾岸皆茂林深竹猿猴彩雀上下呼鳴暹村錯落田疇沃饒粟藁長一丈許播秧後有黃河至苗隨水

長無滂傷之患水退而稻熟矣故其耕種之農皆棹舟出作無俟芸鋤穀熟仍棹舟收穫而歸黃水至此其勢散而緩田疇肥磽入死則焚尸而後葬或發願死後以尸飼魚鳥將造巨艦載萬餘石求桅於深山中遇大樹先以咒語求告如樹神允許方下斧產銀鉛錫象牙犀角烏木蘇木冰片降香翠毛牛角鹿筋豆蔻燕窩海參菜等貨暹羅土產之豐與旁葛拉即榜甲拉相等但暹羅米穀價更賤高地亦能種麥其木最堅美宜於造船且料多而價賤較中國造船費惟值半價又多紅木或運出新埠或載廣州上海天津甯波等港又多種白糖胡椒每年六萬餘石亦運賣與中國其白糖十萬餘石漢舶買豆蔻降香樹膏藤花各項顏色白糖紅木烏木檀香象牙錫虎骨虎皮牛皮犀角並雜貨唐人之船亦載米糖賣與南海各島最多在新埠各海港所進中國之船每年約九十隻小船甚多俱由海南島昔有花旗船載舊鐵礮以易白糖每年約一二隻今則少矣印度國每年亦有數船到是港載布疋易白糖等貨統論漢船每年所載之貨約四萬噸外國之甲板約二萬噸向暹人無水手後有世子仿外國甲板船亦造數隻赴各國貿易遂爲通商之始山產金沙錫鍊所出之果尤美於他國尊卑貴賤皆築廟建塔然無路無橋無一肯捐建者此其大惑也男女居俱罕穿衣服女露胸臍各剃頭頂留髻男女皆浴身以游食甚菲薄不殺牲破卵惟請外國人則用之好建寺廟不惜費自居則草寮惟漢人所寓始有五石庶民每月必以三分之一供徭役不樂務本業蓋稍得蠅頭官吏則強奪之故耳五爵甚多下品觀其上品必匍匐不得立起民詐而驕傲有礙難卽失膽不敢行動信輪迴之說每年有潮州福建人赴暹羅居住多取其士女現所居者二萬餘棄漢俗衣食一如暹羅國王亦擇其聰明者官之使理征賦貿易之事暹軍亦隨時伐鄰國虜居民遷至本地其中緬甸文萊巫萊由老掌人等甚多自外來者各操本俗征餉甚重居民共計三百萬惜政令太苛 暹羅本古地元時始知其名入貢中國與緬甸文萊占臘千賓等國爲鄰時時肇衅交

戰或勝或敗葡萄牙人於萬歷間初至此國開埠貿易後英人與佛蘭西皆至此通商方漢人未到是國以前貿易祇數萬名英國公班衙於其地開行有奸人賄王用事遂招佛蘭西人至於康熙二十五年佛蘭西兵士守港口於是國人殺王驅佛蘭西軍更立新主通商如故乾隆三十八年緬甸軍陷其都城且火之虜其民爲奴全城荒蕪漢人情之倡義起兵驅敵卽今國王之祖也自後國復興旺漢氓日增貿易益廣道光四年緬甸與英人交戰之際暹羅結盟於英合陣前往盡復前所失地於是與英人及花旗等國大通貿易但運出者價昂運進者價低今王已老其世子聰明親造火輪船他國藝術無不講求習英語讀英書能自樹立在各國中爲無雙矣道光八年侵老掌地虜其人爲奴又前與安南屢戰屢和爲爭據占臘國暹羅與越南各分占其半兩國搶奪至今未息國有五爵官憲俸祿無多不足以養其廉也國所收餉銀百五十萬兩其所居之族類各有頭目領之律例與中國相仿其經冊皆係粵語其語音亦純用梵語其字樣與華音亦有相似其書冊大半虛誕不錄緊要事唐人繙譯三國演義與暹羅人閱看所有花旗傳耶穌之教者亦藉此音以敘述之其書本頗多或闡教理或訓藝術通國分五分之一曰暹在默南河兩岸地豐盛其都曰萬國城居民二十萬口板屋列市浮於河寺殿甚煌餘皆渺小民貧乏富者惟漢商及五爵由此更進則爲古都曰由他雅城已荒廢居民甚少海邊又有斬地文萬巴賽等邑亦通商多胡椒二曰老掌所讓地在北方皆山林出紅木烏木象牙等貨族類多蠻人虜爲奴者也其民樸實事暹人如子事父惟產業甚微不能納貢物三曰占臘卽甘賓地也新歸暹之版輿其土豐產而少人戶焉四曰文萊國之數分與英之藩屬及緬甸交界兩國山中地美而未有墾之者亦無新民遷者五曰巫來由種類之地其地之一分曰貴他部與英國之檳榔嶼相對是出白糖米穀餘皆土酋歲貢于暹

亞西亞地曠西出蘇門馬六加二地中間爲海峽各島散布如星棋最大者檳榔嶼在西邊距對面貴他

大山不遠北極出地五度二十五分偏東一百度九分廣袤方圓五百居民五萬有一千嶼有高山有溪地氣和暖山水甚美前本荒島乾隆五十年英國公班牙買爲船廠開墾豐盛每年出胡椒二萬石丁香豆蔻價值銀十萬圓對面之貴他島亦種甘蔗產物三萬石日增月盛四方雲集福建人尤多居然都會國家所費有限而收餉過之 新嘉坡或稱新實力坡或稱新埠頭海峽中之嶼北極出地一度十五分偏東一百零四度土甚礪大林多虎出胡椒檳榔膏爲印度繞至中國之路海由西轉東此峽爲所必經故英國公班衙於嘉慶二十三年買以開埠其始居民僅百五十口頓增至一萬餘中多唐人盡免稅餉道光十四年各西國及他國之甲板四百七十二船中國之商二十七船越南四十九船暹羅二十四船燕來由七十二船婆羅島一百三十八船西里白島五十五船巴里嶼六十三船牙瓦島七十二船蘇門他拉島五百一十四船檳榔嶼八船馬六加六十船西邊無來由族類四十六船料嶼二百五十一船附近之列嶼二百二十船各國所運入貨物約共一千萬圓而運出之物有加於此各方雲集遂爲亞細亞之大市 新嘉坡實當島荷蘭在此築礮臺開市稱曰料嶼出胡椒檳榔膏土民所食者參菓葉檳椰子製造物件多潮州人通商不廣收餉甚微設兵守島有巡船捕海盜有燕來由島西代辦島務 實當島所屬合音嶼燕來由以劫盜爲務荷蘭與約給俸祿令其毋爲海賊有犯卽刑其地礪出錫無他產亦不出五穀此島之北向有亞南巴邦土那處荒島爲海賊所潛匿

馬六加古國也北極出地二度及十度長二百六十五里闊四十里其地半燕來由族類中間黑山遍延內多支溪下流入海有沙線入海口居民甚罕性伐木搭棚而已山內盡黑面人無衣服居處向屬暹羅管轄其馬六加之君於宋德祐三年始創立國明武宗正德五年暹羅大軍攻其城敗退葡萄牙水師攻陷其地自後歸葡萄牙順治元年荷蘭又降其城邑嘉慶間英人又破之是時有耶穌門徒開學館教化

其俗當此際有英吉利官管頭但通商甚微物產不多如金沙錫南果胡椒五穀悉由外國運入天氣清爽無瘴氣民居罕少亦有燕菜由并印度人其山水特美麗

燕來由列國沿南洋海斗出甚長其中多山草木茂盛多檀香沈香沙藤山多錫礦溪有金沙海邊多椰子民惰地荒獨海邊有數屋皆竹葵爲之附近種蕉樹食其果終日嚼檳榔青烟以水和飯日用不多故頗自足每日多眠睡間出爲海盜乃盡力劫掠體矮而帶喜色若激其怒則憤烈如虎然無胆畧易奔潰沿海各處有土酋皆貧乏賴中國人代理其貿易最多者厦門等處之人其餘若燕來由之列地由暹羅而南斜行到六坤宋脚此地之民半暹羅語音喜拜佛像半燕來由各類並回入拜天地真主暹羅之官在此者每酷虐燕族其大尼車丹丁葛奴等地沿山陸續皆以金銀樹貢暹羅且准貢使買五穀而回南連此地者曰彭亨南方之極南者曰柔佛另有微地難細述風俗多相似所產亦相同中國閩廣人至此貿易每獲厚利民以金錢爲幣重四五分不用銀惟用番頭以爲通行之寶經商每年僅可容三四舶所市者金沙胡椒沙藤冰片海參燕窩翠毛佳文席亦以鴉片布疋易胡椒等物

緬甸國北極出地自十五度四十五分及二十七度二十分長二百六十里闊一百里北連雲南南連暹羅並馬他班海隅東連老掌並雲南西連英吉利藩屬及旁甲拉海隅海濱甚低餘皆山產鐵銅錫紅銅鉛金銀石油火硝食鹽紅藍寶石最多石油由深井汲出色青厚燒之出黑煙林有堅木宜造船亦出漆油並紫梗禾甘蔗粟米豆煙綿花青黛內多象虎豹熊野貓野雞鵪鶉金雞沙佳鵠居民約八百萬地多荒蕪罕耕種其人身高體健顏色黑紫雕題文皮男女多裸身耳穿孔挂金銀飾性貪不喜笑性詐而傲崇佛養僧其僧黃衣髡首乞食居寺多造塔以金鑲佛像民貧官富語多異音中多老掌文萊之民皆拜佛山內有野民族頗愈不一緬甸人能織文花布亦能刻花木造奇巧金飾惟不知天主教人好武勇

性酷虐寡欲而惰男逸女勤不濫飲食每飯恒嚼檳榔老葉好飲酒不好殺獸不食牛肉牛嫻男女均以黑色染指甲口唇若敬人則坐不立男女往來苟合不以爲辱所立規矩法律俱由印度來亦多與中國合其始在周景王時距今二千三百九十一年前由印度遷至一千七百四十年前遷都於他處今日尙存其廟古蹟于元順帝三十一年始建今之阿瓦都城歷傳三百六十九年有文萊島之民與師敗緬後再戰敗而文萊反歸緬乾隆十四年文萊買西洋火器并募荷蘭葡萄牙各國人協力攻緬陷其都逐其王據其國有一小官起義兵百人抗拒既而國民雲集盡力恢復後中國兵兩侵其地多病瘴癘退師緬人掠其軍以配土女別居新城故今緬地尙有漢人苗裔又與暹羅屢交戰奪遍全境兵氣益驕後緬遂以兵侵印度英人擊退之道光四年國王再侵英之印度界時緬已東盟越南南服暹羅覬覦印度之富遂傾國而來英軍兩年鏖戰於東界不服水土斃者甚眾英終不退兵復添新軍水陸并進聲言將擣其國都緬王畏懼乃求會於南海邊地前時戰費至九百萬兩後彼此息兵亦無侵暹羅之事但尙時與英人肇衅道光二十六年更立之君亦被其世子廢逐失位 民居各族類共約八百萬地分四千六百土司民貪財不善通商貿易皆在河內若米若魚鹽運出者若石油白糖蒜紙兒茶黃銅金等器其漆器綢緞皆由中國來由以拉瓦的江達班摩與雲南通商琥珀寶玉象牙檳榔燕窩等物所買者綢緞布匹金箔糖果紙等貨緬人亦與老掌交易老掌族類最樸實山內多寶玉虎象隨時進貢戰亦出助陣焉 緬都曰阿瓦城五垣而竹屋街衢甚廣廟躍宮宏居民三萬北極出地自二十一度五十分偏東七十六度道光十九年地震安拉補臘爲唐人所居大鎮國之舊居也民居二萬蘭雲馬他萬巴心三城皆海口蘭雲城與印度貿易產堅木多運出造船每年價銀十五萬兩運入者多布匹附近城有大廟高塔愚民隨時赴之燒香拜佛用重金鑲塑木像前時之都屬文萊國者稱曰破米多古蹟 王操全權辦事不以律

國中產業隨意奪給有事則征餉納稅無定則王所乘白象以金鑲麻嵌以寶玉與宮無異履花氍食珍羞人敬象如大臣王戶俱會同操權有親政大臣一位輔政官一位副理政事通事官一位各部立帥各郡置官有土司調司皆世襲無俸祿故勒索爲常

緬甸內英吉利屬地皆緬甸讓出海邊地在緬南北極出地十一度及十八度長一百六十里闊十四里海邊別有多島或居民或荒蕪東界皆山高約三四百丈地亦豐盛林多堅木可建船屋所出之物如蠟象牙兕角鹿肉燕窩海參胡椒檳榔蠟紫山內出紅鉛錫居民多緬人時英人據其地共十一萬二千四百口因與暹羅交戰大半荒蕪英人招百姓以保護其地民數頓增民多文萊人流徙至海邊者山內有加連土蠻未向化却喜聽耶穌之教 別有英國所據之地曰馬他班在三支河間地豐盛北方歸緬甸天氣清爽不苦熱地荒蕪蓋緬甸暹羅兩國戰場也現已平靖而民未興復惟隣國之民及漢人咸遷其地爲氓英人築新城在港口曰安黑其土產木料胡椒綿花青黛煙象牙檳榔荳蔻顏色等物多奉耶穌教敬事教主 他威部北極出地由十度二十五分及十五度三十分長百一十里闊十里沿海東連暹羅廣延皆山高四百丈其海邊多港汊其洲低其島皆石產錫多象牙木油紅木燕窩海參木料檳榔民性愚野奉天主教前緬甸官勒索居民有貴即奪故百姓媮惰今則各安其分又漢人多遷居之每年國所費銀五萬五千兩其護守兵千五百丁水師船三隻 地那悉林部地最窄在海邊南及燕來由地皆密林難通路其島繁多地甚饒瘠產檀香巴馬油紫梗樹脂乳香南果尤香美在海邊燕窩海參珍珠皆歛之民其民無居處惟浮海面絕不耕田止以海味爲食其都會曰墨危英軍士常攻擊此處蓋阿瓦國都恃地險瘴惡爲負固其瀕海之地則暹羅英吉利常吞并之焉

小呂宋各島在中國之東南廣袤方圓四千七百里居民六百萬丁其島嶼洲甚多延自北極出五度及

二十度多雨有火山常地震而土則豐盛出米煙糖加非苛苛甚盛米穀有餘皆運售中國有大樹可爲
桅又出蠟蜜糖好馬野牛其土人體矮語音風俗各殊百姓順長敬尊然素性詭詐販賣人口爲奴今多
歸天主教固守禮義其奉回教者以海盜爲業山內則皆黑面人未向化以草木爲食明朝時島君入
貢中國自明以來多福建泉州人每年商船大集亦多遭壞其羣島曰閩他邦島撒馬島米地島巴尼島
西布島閩多羅其最大者惟呂宋爲是班牙國兵所駐於明嘉靖三十九年是班牙船始到此島隆慶二
年調師船往據其地其土人多不服及今日尙有島不屬所轄者是班牙既與中國日本開通商之路貿
易歲倍唐人來不勝數釀成巨衅爲是班牙所誘戮者幾萬人乃立法律惟準商賈居住船回商亦回惟
入天主教始准任意居住焉更兼管束其貿易禁例煩擾惟泉州船恒時來往乾隆二十六年是班牙國
與英人戰英人將奪其地許以重賄始退兵焉然其銀今日尙拖欠也後與亞默利加通商每年一二巨
艦裝十五萬石價值約千二百萬圓由亞默利加所運出者多銀條或中途與他國交戰而失其船則所
損重矣嘉慶年間亞默利加藩屬地自立爲國不受是班牙管轄廣開港口所獲利漸微乃復調兵帥以
代治其島會同土人護守之每年國帑所收銀百五十萬圓所運入之貨約銀五百十五萬七千餘圓所
運出者約銀百四十三萬六千圓其土產每年益增准外國任意往來不復禁止故通商愈興旺惟國帑
久空所收稅務未足償還本國欠項也 其都在呂宋島曰馬尼臘內多禮拜堂教師甚盛 臺灣呂宋
之中間尙有數島屬是班亞國者其居民不多出糧食與他國不往來惟有遭風船到彼尙蒙接濟其難

民焉

婆羅島最廣之島也北極出地五度及南極四度半原名曰古曼坦長二千五百里闊千有百六十里其
內地未及深入故未能知其底裡惟海濱之埠荷蘭人所開者在西北兩海邊蘇來由民遷此地塔棚藏

匿海盜者東邊於布吉開埠貿易其奴卷髮黑面皆未向化之俗類也古今唐人萃焉廣東嘉應州人最多或開肆或采金沙或販錫藤胡椒烏木別有一族專以漁爲業居民甚罕共計不過四百萬而已內地多高山每年掘金沙者二十萬人所掘金沙約十萬兩有餘每月一人出金一兩有餘其中漢人自立長領不服他國亦有大富建廣屋者亦有務農者內河產金剛鑽石及他寶玉一塊價值三十萬兩爲列西國所貴亦產紅鉛珍珠海參獸則有野兕豹野豬牛其居民養水牛猪等畜山中有冰片桂皮土蠻之中多燕來由族代之耕作頗安分但激其性則猛如虎常殺人取首掛之頸上以爲號否則無與婚焉各族互爲仇敵惟他押族力於耕朴實不詐燕來由土君駐邑曰埔尼前數年以其所屬地撒拉空給英人英國封之爲君教設律例彈遏海盜釋放他押奴可謂賢君矣後嗣無道私殺其善臣英人怒討之且盡力殄滅海盜荷蘭國之埠共三所南曰班熱馬星西曰三巴曰本地亞納貿易皆不甚大昔英國人亦於此間開埠後復失之旋又開埠於西北邊拉布安島與中國火輪船往來貿易雖產石炭其嶼尙荒蕪近婆羅島最著名者曰蘇祿洲共六七里北極出六度偏東百二十度以婆羅東北向與中國通商入貢所居多漢人廣開墾出蠟玳瑁穀雲母穀珍珠每年值銀二萬五千兩海菜桂皮冰片烏木胡椒沙藤香等貨其土民各異與燕來由悉崇回回教與附近各島通商此時除西洋甲板船之通商居民悉海盜爲商船害尤與呂宋是班牙國爲仇一國調兵船以討之

西里白島形勢千曲萬環北極出自二度及南極出六度偏東自百一十九度及百一十五度廣袤方圓二千五百五十萬里居民三百萬口多支港內地溪河四流多灣泊處米穀罕而珈琲豐盛有金沙亦產燕窩海參玳瑁魚翅等貨賣於中國俗類不一言語風俗教門亦俱不同最向化者居南方破尼海隅名曰布吉航駛南洋開市貿易設公會其土君各有五爵襄治亦有妃及女爲君者與歐羅巴不通往來

亦不遵他國之命皆崇回教不畏死內外之民稱曰馬加撒多奉耶穌之教荷蘭國在極南開馬加撒
卑廣袤方圓三百七十五里居民約五萬四千口在東北地開默邦多口二百五十里運出珈琲每年約
數五萬石居民善經營但不敢航海

眾島之中牙瓦最貴古名小瓜哇今名葛留巴南極出自五度三十八分至六度四十分偏東自一百零
五度十一分及一百一十四度三十二分廣袤二千七百四十五方圓里居民七百萬中地山高自五百
丈至一千二百丈其東方之山高於海面一千六十一丈此山多峯有若火山近日火滅大半尚有數處
出硫磺氣牙瓦地多支溪當霖雨時可舟行者數十處餘皆供灌溉田南北均有海灣可泊南有高壘北
多低澤甚煙瘴有泥火山恆流鹹水沖出黑泥其天氣谷熱而山涼多大雷電地震天氣有六變故所產
物亦殊異牙瓦土肥出穀米又出白糖加非黛青胡椒胭脂八角馬芹畢澄茄椰子茶葉及各種嘉果多
蛇虎而水牛極高有力不獨耕田亦可推車此島有八分之七未墾且不善務農又官吏迫納餉賦故無
餘蓄其土民大半紫黑色樸實耐勞但不甚聰明惟上命是聽受虐不怨本奉印度佛教明永樂三年有
回回教師領大軍強服其土民使棄偶像而拜回回教主元時亦入貢中國葡萄牙船於萬曆間到此島
與土民交易荷蘭與英人繼之嗣後兩不相合荷蘭立城爲藩屬國之都力戰土酋服之教種甘蔗加非
等貨其利甚厚嘉慶十五年佛蘭西欲據此島英人調兵先取之立法律力保土民通商旅二十年復以
此地再還荷蘭當今居民五百有餘萬服荷蘭所轄者五分之三其餘屬土酋道光五年有土民糾海邊
蘇來由族類起兵攻荷蘭連兩年不能克且頭目被擄荷蘭王益調兵帥掌全島之政每三年與議士斟
酌法令所派各大官皆由荷蘭國至其餘小官皆生長此地且於僑寓唐人中擇立首領按本律例以管
所屬之人又立各族類頭目使管本地之民惟聽荷蘭大帥之命所傳之兩舊土酋在內地安逸度生而

已各島稅務每年銀一千八百萬兩除給各公費尚存庫百萬兩調水師船數十巡羣島以遏海賊調兵守各埠約二萬丁運出之貨道光十六年加非六十二萬二千五百九十七石白糖六十三萬六千八百九十二石米一百九十萬二千九百石黨膏四千零七十八石錫五萬九千六百七十四石道光十八年加非七十三萬七千五百石白糖九十一萬八千七百五十石米一百一十八萬七千五百石黨膏七千四百三十石錫五萬一千九百六十六石其貿易可謂甚廣因多立禁諭商不得任意運貨往來故有阻礙包攬之弊 荷蘭駐札之都曰巴他威城在西南海邊居民六萬二千族類不一種北面海口曰蘇拉拜居民五萬丁撒馬耶居民三萬八千丁皆與他島貿易惟外國之船獨於巴他威或甲拉巴通商焉內地土酋所駐之大城曰蘇拉甲他居民十萬五千口儒約甲他十萬口其殿廷極廣大

馬士拉在牙瓦之東北邊隔以海峽居民二十二萬丁崇印度佛教居民猛勇陣則爲荷蘭之助島長三里闊約六里多出米穀以補他島在牙瓦各海口亦有唐人經商之富 巴里島在牙瓦之東南隔以同名之海峽南極出八度四十一分偏東一百一十四度二十五分岸高難泊其居民尚執印度佛教屍皆焚葬其前君卒妃妾七十二人皆願自焚土人不善駕船出米油檳榔燕窩等貨居民八十萬口鄉里長領之外餘悉貧乏自道光十七年以來土酋各結黨互戰 屬此島之淪泊有峯高八百丈南極八度二十一分偏東百一十六度二十六分長十六里闊約十四里米穀豐盛每年三萬有餘石載甲板賣與中國居民崇印度佛教頗勤勞安分用中國之通寶錢歷來小土酋結黨相殺荷蘭人排兵船以定其爭然終未太平 距此島不遠爲孫巴瓦長六百里闊十三里出堅木駿馬金沙居民鮮少未向化罕與外國往來有火山出火石煙火漿令四方震動 弗力島在八九經度間偏東自百一十至百一十三度出金沙椰油檀香蠟燕窩玳瑁等貨前此荷蘭據其東方今又有布吉據其地與外國無往來葡萄牙人在此

傳天主教築禮拜堂土民面黑喜門有所獲則販賣爲奴 地門島闊八百里長約十三里皆山地出檀香每年約一萬石金有沙禁不准掘荷蘭人於此開礦土人殺之亦出銅蠟椰子椰油等貨崇耶穌教各鄉設學館此島分二分西分歸荷蘭其港口曰古邦東方歸葡萄牙築礮臺曰和睦每年由澳門開船前往買黑奴蠟檀香等貨雖設嚴禁犯者益多祇以人口爲買賣之物甚可恨矣其居民不似蘇來人髮髻面黑皆土著不樂航船 外此尙多嶼洲如鹿地檀香勒地等嶼皆小而微

蘇門他拉此爲長島與牙瓦島以孫他海峽相隔長約三千五百里闊約五百五十里地分三分東北甚低有血蝎產沙米穀米安息香大河由此入海海濱出胡椒地雖低無大澤西北高出檳榔中多高山有千三百八十四丈山下廣坦暑月亦涼土人樂之又多湖澤西則溪川四處灌漑地常震火山出火漿又多金銅鐵硫磺石炭石油硝等物但居民未悉采之法金礦每年可出三萬兩遊山者或偶遇之有一塊重九兩者其穀僅能足居民食用惜地未開墾草木暢茂爲野獸之藪產胡椒檳榔及冰片之樹計冰片數斤必伐木三百株惟中國貴之每年運出六千六百五十斤耕田以水牛林多犀象虎猴狒狒水中多蝦蟇蛤蜊蚌蜆林中有金雞神鷹鶴鵠鵲鸚鵡運出之物如安息香桂皮綿花加非等貨計萬萬石又有乳香楠沈紅木烏木等料居民多燕來由族類崇回回教其教師嚴禁鴉片及各輩物民色紫尊貴人以金鑲齒居民恒帶短刀有要事則誓諸墓以舊器爲盟在海口販人爲奴百姓不好城居自建鄉里竹葵爲寮食不用箸以手搏之飯惟魚蝦花椒等物以老男女爲醫生不必通其藝隨意令病者服藥教外之人皆好賭博食鴉片海邊居民以搶劫商船爲事其內地民則朴實有大城曰黑囊加報城亦燕來由族類此族人在元以前獨住蘇門他拉一島後散布羣島不啻千萬仍以此城爲聖域赴其廟以祀神地多產金居民皆造金器亦善造火器火藥短刀乾隆間土酋互相戰鬥嘉慶間請荷蘭兵助遏其教師荷

蘭遂據其地 蘇島有名之國曰亞珍或曰亞齊昔與中國通其君住草舍道甚微居民憚勞苦 此國之南方有巴答蠻者雖向化辯字務農卻食人肉戰則虜人爲糧或父母老邁卽食其肉昔耶穌教師至此欲化之爲士民所殺後遂無入境者在南方有離利讓等族類崇佛教其民情貪 明萬厯間葡葡亞船在此島通商與海賊肇衅英人隨之在西南海邊開賓古林埠二百餘年以胡椒貿易乾隆年間始種丁香薏蔻後以此地讓荷蘭順治年間在西海邊開巴當海口亦在東邊占巴林邦所據之地道光年間始爲全島之主由此衅起與土人久戰亡其軍再戰始勝之然耗兵糜餉始令民種加非樹土產日增惟西北各金山歸荷蘭唐船每年有一二到巴林邦口買沙藤錫胡椒等貨海邊又任漢人開市百姓爲荷蘭管束不敢遠出

附近此島各地一曰罔加島在蘇門之東其地磽產紅石錫礦甚盛每年出六十萬餘石爲荷蘭所轄廣東嘉應州人多在此開錫山收餉頗重一曰北里屯島距罔加不遠多海賊航船者難之 又蘇門西爲尼押羣島居民愚蠢燕來由虜賣之爲奴地亦豐盛惜無人開墾

東南各嶼曰摩鹿加島一作美洛居地磽出粟多火山多地震山爲谷谷爲湖所常見也居民朴實出丁香玉果出售遠商與荷蘭往來多奉耶穌之教亦有回回族自爲教門明萬厯間葡葡亞初到開埠與土君戰是班亞兵船亦爭此地荷蘭遂乘間而據是嶼後各島歸荷蘭包攬丁香玉果之貿易且諭土民盡伐其樹令他國無可買處如結果太過恐以是減其價卽憐此果每年出了香約六千石玉果約七千石豆蔻花約二千石大半售於歐羅巴各國他島近亦種是樹價終減焉荷蘭調軍士數千駐安本島桑轍臺其班他悉蘭在北方黃道之內特那地乃火山島義羅羅大嶼大半竟無主其島地突島摩得島馬善布羅島出好檀香並花木 荷蘭各藩屬在羣島之中廣袤方圓共萬六千四百里居民千四百六十四

萬四千俱聽荷蘭之命各島廣袤方圓七千九百五十五里居民三百八十五萬一千口

南洋羣島最多形勢最大南極出地十二度四十分及北極二十度偏東自九十二度至一百三十四度各相連皆在南北黃道帶內故其天氣物產情形皆相似大山茂叢並多古蹟產物最貴由此而西各島分峙第一帶爲蘇門他拉島牙瓦島巴里島倫薄島偏東一百一十六度土地豐盛居民務農第二帶爲西里白在羣島之中東界係補東島撒刺益等島皆延偏東一百一十六度及一百二十四度婆羅島亦在此度內所居族類不一第三帶島自偏東一百二十四度及一百三十度北極出自二度及南極十度大半皆蠻其中有向化者亦奉耶穌之教食物係沙穀米產丁香玉果等物第四帶係呂宋羣島出米穀居民頗向化多地震第五帶係錫蘭山重五印度羣島族內有兩種其一居各海邊身短色紫髮長其二係土民黑面髮卷而長體短且蠻居林內總計東南島嶼棋布星羅其中央大地無如奧大利亞洲者廣袤方圓約十五萬里南極出地自十度至四十度偏東自一百一十二度及一百五十四度此地支港不多江河亦少海邊有山嶺其地平坦廣有草場巡遊者雖多終不知其內地形勢之詳其北方近黃道天氣甚熱南方則冷水凝冰結內地低夏時多東北東南等風冬時多西北西南等風天氣之寒煖與別國不同往往冬夏相反雖長亢旱而其露如滴且無煙瘴故外人至者皆服水土樹木約四千二百種高約五十丈便於建船屋數年前其地惟出莠後英人種蔬菜南果葡萄荔枝等樹皆蕃盛尤美花卉因缺水灌溉惟可植麥不宜禾多野獸無性嗜其船載牛馬羊豕至日加蕃殖鳥多鸚鵡翠翎之屬海族多蛤蜊螺蚌而少魚鼈土人極卑陋無衣無宇奔走林內遇外國人惟求酒食醉即安睡雖耶穌門徒教化終無改變明萬歷三十三年荷蘭初到此因其荒蕪不足開墾遂去故其島至今尙有新荷蘭之稱非婆羅哇之新荷蘭也迨乾隆四十一年英國水師官遠尋至此徧覽情形乾隆五十二年議將徒流之人押配